

Headlines

1. न्यायमूर्ति अरुण पल्ली होरें गी जम्मू ते कश्मीर ते लद्दाख हाई कोर्ट दा मुख्य न्यायधीश नियुक्त कीता गेआ।
2. जनजातीय मामलें दे मंत्री जावेद अहमद राणा होरें नगरोटा च बहु उद्देशिय मार्किटिंग सेंटर लेई इक करोड़ रपे आलॉट कीते।
3. व्हाइट नाइट कोर दे जीओसी होरें राजौरी ते पुंछ जिले आली कब्जा रेखा कन्नै लगदे इलाकें दी सुरक्षा स्थिति दा जायजा लैता।
4. बाड्डी दा ध्यार "बसाखी" पूरे जोश ते उत्साह कन्नै मनाया जा'रदा ऐ। उपराज्यपाल ते मुख्यमंत्री होरें लोकें गी इस मौके पर शुभकामनां दित्तियां।
5. तीरंदाजी विश्व कप स्टेज-1 कंपाउंड मिक्स्ट टीम मकाबले च भारत दी जोड़ी नै सुन्ने दा तगमा जित्तेआ।

<><><><><><>

New CJ JK

केन्द्र सरकार शनिवारें जस्टिस अरुण पल्ली होरें गी जम्मू कश्मीर ते लद्दाख हाई कोर्ट दे चीफ जस्टिस दे तौरा पर नियुक्त करने बारे अधिसूचना जारी कीती ऐ। केन्द्री कनून मंत्री अर्जुन राम मेघवाल होरें इस बारे घोशणा गी सोशल मीडिया प्लेटफार्म एक्स पर सांझा करदे होई आखेआ ऐ जे नियुक्ति भारत दे प्रधान न्यायधीश हुंदे कन्नै सलाह सूत्र दे बाद राष्ट्रपति हुंदी मंजूरी मगरा कीती गेई ऐ। जस्टिस पल्ली एहल्ले पंजाब ते हरियाणा हाई कोर्ट च जज न। सुप्रीम कोर्ट दे कॉलीजियम नै पिछले हफ्ते उंदी नियुक्ति दी सफारश कीती ही की जे मुख्य सचिव ताशी राबस्तन रटैर होआ'रदे न। जम्मू कश्मीर ते लद्दाख दे चीफ जस्टिस दे तौरा पर उंदा कार्यकाल उंदे अपना औहदा सांभने दे कन्नै शुरू होग।

<><><><><><>

SC Ruling

सुप्रीम कोर्ट नै आखेआ ऐ जे राष्ट्रपति होरें गी राज्यपालें आस्सेआ राष्ट्रपति दी मंजूरी लेई आरक्षित राज्य विधेयकें पर 3 महीने दे अंदर अंदर फैसला करना लोड़चदा ऐ। न्यायमूर्ति जे.बी. पारदीवाला ते न्यायमूर्ति महादेवन हुंदी पीठ नै इक फैसले च आखेआ ऐ जे इस अवधि च जेकर कोई देर रौहदी ऐ तां फही ओहदे वैध कारण दस्सने चाहिदे ते सरबंधत राज्यें कन्नै सांझा कीते जाने चाहिदे। पीठ नै तमिलनाडू दे राज्यपाल आर.एन.रवि हुंदे आस्सेआ दस लंबित विधेयकें गी मंजूरी नेई देने दे फैसले गी खारज करी दित्ता ते इस उप्पर फैसला सनाया के राष्ट्रपति गी बी राज्यपालें आस्सेआ भेजे गेदे विधेयकें पर फैसला लेने च 3 महीने शा मते समें नेई लैना चाहिदा। जेकर तैह समें सीमा दे अंदर कोई कारवाई नेई कीती जंदी तां फही राज्य गी न्यायलयें च जाने दा हक्क होग। सुप्रीम कोर्ट नै एह साफ कीता जे जेकर संवैधानिक चिंताएं दे कारण कोई विधेयक राकेया जंदा ऐ तां फही अनुच्छेद 143 दे अंतर्गत राष्ट्रपति सर्वोच्च न्यायलय थमां सलाह लैन।

<><><><><><>

Marketing Centre Nagrota

मकामी ढांचागत सहूलतें ते आर्थिक विकास गी बढ़ावा देने दे मकसद कन्नै जनजातीय मामले दे मंत्री जावेद अहमद राणा होरें पंजग्राई च भलेया अज्जै कल्लै दिएं सहूलतें कन्नै लैस बहु उद्देशिय मार्केटिंग सेंटर कायम करने दी घोषणा कीती। एह्दे लेई इक करोड़ रपे दी राशि दी घोषणा कीती गई। धरती आभा जनजातिया ग्राम उत्तक्रश अभियान तैह्त् एह् प्रोजेक्ट इक मंच उपलब्ध करोआया, मकामी बपार ते कारोबारी गतिविधिएं लेई। किट्ठे गी संबोधत करदे होई मंत्री होरें पूरे पराते विकास ते जनजातीय समुदाय दे समग्र ते लगातार जतनें राएं विकास आली मुखमंत्री हुंदी वचनबद्धता गी फही पक्का कीता।

<><><><><><>

GOC Visit

सेना दी व्हाइट नाइट कोर दे जीओसी लैफ्टिनेंट जनरल पी.के.मिश्रा होरें कल राजौरी ते पुंछ जिलें दे नशैहरा, कृष्णा घाटी ते भिम्बर गली सेक्टरें दा दौरा लाया ते उत्थें सुरक्षा हालात दी स्थिति ते कारवाइएं सरबन्धी तैआरिएं दा जायजा लैता। दौरे दरान एस ऑफ स्पेडस डिवीजन दे जीओसी मेजर जनरल कौशिक मुखर्जी बी उंदे कन्नै हे। एह्दे शा अजें दऊं रोज पैहले गै भारत ते पाकिस्तानी फौज बश्कार इक बैठक लग्गी ही जेह्दे च दौनें धड़ें सीमा प्रबंधन दे बारे च चर्चा कीती ही। दौरे दरान लैफ्टिनेंट जनरल मिश्रा होरें उत्थें तैनात सैनिकें दी हिम्मत, दलेरी, निष्ठा ते पेशेवराना सलाहियत दी सराहना कीती जेह्दे देसै दी सुरक्षा दी खातर दिन रात डटे दे रौह्दे न। खित्ते च पिछले दिनें नियंत्रण रेखा दे पारै थमां संघर्ष विराम दी खलाफवर्जी दिएं घटनाएं दी पछोकड़े च सुरक्षा ते सर्तकता होर मती निगगर करी दित्ती गेदी ऐ।

<><><><><><>

Svanidhi Campaign

घरे मकानें दे शैहरी विकास मैह्कमे आस्सेआ आयोजित स्वनीधि से समुंद्री ते में भी डिजीटल जतन सम्पन्न होई गेआ। एह् कार्यक्रम इक हफते तगर जारी रेआ। 17 शैहरी मकामी निकाएं च एह्दे तैह्त् 12 सौ रेहडम् फड़ी आले ते परोआरें गी लाह हासल होआ। एह्दे राएं इनें लोकें गी समाजी सुरक्षा आली ते कल्याणकारी स्कीमें जियां आयुष्मान भारत, जन धन योजना ते होरने कन्नै जोड़ेआ गेआ। एह्दा मकसद डिजीटल अदायगी गी बढ़ावा देना ऐ।

<><><><><><>

Baisakhi Festival

बसाखी दा ध्यार पंजाब ते उत्तर भारत दे होरने किश राज्यें दे इलावा अज्ज जम्मू कश्मीर च बी मते उत्साह, सद्भाव ते भाईचारे कन्नै मनाया जा'रदा ऐ। फसलें दी बाहड्डी मुक्कने पर मनाए जाने आले इस ध्यार गी डुग्गर च बसोआ जां बसोए दा ध्यार बी आखेआ जंदा ऐ। जेह्ड़ा करसानें लेई नमीं रूत दी शुरुआत दा बी प्रतीक ऐ। मंदरे ते गुरुद्वारे च अज्ज विशेष पूजा अर्चना कीती जा'रदी ऐ। सिक्ख धर्म दे अनुयायिएं लेई बसाखी दा महत्व इस करियै बी मता बधी जंदा ऐ की जे सिक्ख दे 10में गुरु श्री गुरु गोविंद सिंह जी होरें 1699 च बसाखी आले ध्याड़े गै 5 प्यारें गी अमृत पान कराइयै सिक्ख पंथ दी स्थापना कीती ही।

<><><><><><>

Baisakhi Greetings

उपराज्यपाल मनोज सिन्हा ते मुखमन्त्री उमर अब्दुल्ला होरें जम्मू कश्मीर दे लोकें गी ममारकबाद ते शुभकामनां दित्तियां न। उपराज्यपाल होरें अपने ममारकी सनेए च करसानें दे योगदान दी सराहना कीती ते लोकें गी श्री गुरु गोविंद सिंह जी आदर्शें गी अपनाने दी अपील कीती। उमर अब्दुल्ला होरें इस ध्याड़े गी सादी संस्कृति ते राई-बाई दिएं रम्पराएं दा प्रतीक दस्सदे होई जम्मू कश्मीर च रमानदारी, सद्भाव, तरक्की ते खुशहाली दी कामना कीती।

<><><><><><>

Tawi Riverfront

बसाखी दे मौके पर जम्मू स्मार्ट सिटी, जम्मू नगर निगम ते सैलसफा निदेशालय किट्ठे रलियै केई कार्यक्रमें दा सरिस्ता करै करदे न जिंदे च विक्रम चौक पर सूर्जपुत्री तवि दे सब्बै कंडे तवि रिवर फ्रंट पर रिवायती छिंज ते तवि आरती दा आयोजन बी शामिल ऐ। तोआई बसाखी दे मौके पर सैलसफा विभाग आस्सेआ श्रीनगर दे जबरवन पार्क च बी विशेष रंगारंग सांस्कृतिक आयोजन कीता जा'रदा ऐ।

<><><><><><>

Baisakhi

अज्जै दे रोज देश भारतीय सुलगता संग्राम दे उस सयाह ध्याड़े गी बी चेता करदा ऐ जदूं 1919 च अंग्रेजें, अमृतसर दे जलियावाला बाग च बसाखी दा ध्यार मनाने लेई किट्ठे होए दे निहत्थे लोकें पर अन्नेवाह गोलियां चलाईयै 379 लोकें गी शहीद करी दित्ता हा ते 12 सौ कोला मते लोक घायल बी होई गे हे। शहीद लोकें च महिला ते बच्चें बी शामिल हे। अज्जै दे रोज उनेंगी चेता करियै श्रद्धांजलि बी दित्ती जंदी ऐ।

<><><><><><>

Fisheries Ramban

मछी पालन च नमिएं तकनीकें ते काहडें दे इस्तेमाल ते उद्यमियता गी बढ़ावा देने लेई मछी पालन मैहकमा रामबन आस्सेआ मछी पालन गी आजीविका मिशन तैहत बढ़ावा दित्ता जा'रदा ऐ। एह सारे कम्म प्रधानमंत्री मत्सय संपदा योजना तैहत होआ'रदे न। इस जतन तैहत मुख करी ध्यान मछी पालन, तकनालोजी, मछी दी पैदावार बधाने ते एहदे अलावा आजीविका दे मौके बेहतर करने पर ऐ। एहदे तैहत खास करी ध्यान युवाएं पर बी दित्ता जा'रदा ऐ।

<><><><><><>

Archery

अमरीका दे फ्लोरिडा च, तीरंदाजी विश्व कप स्टेज-1 दे कम्पाउंड मिक्सड टीम मुकाबले च, भारत दे ऋषभ यादव ते ज्योति सुरेखा वेन्नम दी जोड़ी नै सुन्ने दा तगमा हासल कीता ऐ। भारती जोड़ी नै कल रातीं इक रोमांचक मुकाबले च चीनी ताईपेई दे के.हुआंग जाऊ ते चेन चीह लुन दी जोड़ी गी हराइयै ख़ताब जित्तेआ। कम्पाउंड मिक्सड टीम मुकाबले गी ओलंपिक च शामिल करने दे फैसले दे बाद भारती टीम नै पैहली बारी एह प्रतियोगिता जित्ती ऐ। अंतर्राष्ट्री ओलंपिक समिति नै 2028 दे लॉस एंजिल्स ओलंपिक खेड्डें च कम्पाउंड मिक्सड मुकाबले गी शामिल करने दा हाल च गै फैसला कीता ऐ।